



Verwysing: COVID-19/20200517  
Navrae: BK Schreuder

Geagte Prinsipale en Skoolbestuurspanne van alle openbare skole

(Vir inligting: Beheerliggame  
(Vir inligting: Onafhanklike Skole)

### **Riglyne vir die bestuur van Covid-19 in openbare skole**

Op 30 April 2020 het die Minister van Basiese Onderwys die besonderhede oor die heropening van die onderwyssektor deur middel van 'n ingefaseerde benadering aangekondig.

Sedertdien was ek betrokke by 'n paar gesprekke met die nasionale Departement van Basiese Onderwys (DBO), topbestuur van die Wes-Kaap Onderwysdepartement (WKOD), onderwysersvakbonde, beheerliggaamverenigings en prinsipaalorganisasies.

Hierdie komende week sal alle skoolbestuurspanne (SBS'e) en nie-onderrigpersoneel by die skool wees om baie belangrike funksies te verrig ter voorbereiding van die terugkeer van onderwysers (25ste) en leerders. Verlede week tot en met 15 Mei, was meer as 80% van die Wes-Kaapse prinsipale by die skool en net minder as 75% van skole se skoonmaakpersoneel was aanwesig om die skole deeglik te begin skoonmaak. Dit was moontlik omdat skole steeds skoonmaakmateriaal het om die skole skoon te maak (soos aan die begin van enige nuwe kwartaal) en die klein groepie personeel wat eerste terugkeer moet maskers dra voordat hulle hul huis verlaat.

Soos u sekerlik sal weet, is die aflewering van verkrygte goedere 'n reuse-taak. Aflewering het verlede week begin en sal hierdie week voortgaan wanneer slegs SBS'e en nie-onderrigpersoneel by die skool is (en voor al die personeel terugkeer). Die aflewering van die verskeie goedere sal in verskillende fases gedoen word vanweë die hoeveelheid, met die eerste aflewering wat voldoende sal wees om die eerste groep leerders te ontvang. Ons het gereël dat die eerste besending maskers hierdie week deur kringbestuurders en distrikskantore by skole afgelewer word. Die termometerskandeerders is ook geskeduleer om die komende week afgelewer te word.

Die WKOD het riglyne opgestel vir die bestuur van Covid-19 in openbare skole wat daarop gemik is om u beplanning en voorbereiding vir die terugkeer van onderwysers en leerders te ondersteun, en u ook te help om veilige higiënepraktyke te handhaaf.

Die riglyne bevat verskeie stappe, aksies en inligting oor hoe om Covid-19 in u skool te bestuur. Bestudeer hierdie dokumente asseblief noukeuring en gebruik dit om te verseker dat u skool aan die nuwe prosedures voldoen.

Die aangehegte dokumente sluit die volgende in:

- **A – WKOD-riglyn: Belangrike inligting van die Provinsiale Departement van Gesondheid**
- **B – WKOD-riglyn: Rolle en Verantwoordelikhede**
- **C – WKOD-riglyn: Oriëntering van Personeel en Leerders**
- **D – WKOD-riglyn: Sifting van Personeel en Leerders**
- **E – WKOD-riglyn: Skoonmaak van skole en handhawing van higiëne**

Ons wag nog vir die finale dokumente van die nasionale Departement van Basiese Onderwys oor die bogenoemde, asook ander areas waar ons almal groter duidelikheid benodig.

Die WKOD is intussen besig om die volgende riglyne te finaliseer om u verder te ondersteun. Dit sal binne die volgende paar dae ter voorbereiding van die terugkeer van leerders aan u gestuur word.

- **F – WKOD-riglyn: Skoolvoeding**
- **G – WKOD-riglyn: Psigososiale ondersteuning**
- **H – WKOD-riglyn: Bestuur van veiligheid van personeel met onderliggende komorbiditeite**
- **I – WKOD-riglyn: Bestuur van leerders met onderliggende komorbiditeite**
- **J – WKOD-riglyn: Veiligheid van Leerders op die Leerdervoerskema**
- **K – WKOD-riglyn: Bestuur van veiligheid by koshuise gedurende Covid-19**

Ek vertrou dat alle SBS'e hulself sal vergewis van die riglyne en die inhoud daarvan sal kommunikeer. Onafhanklike skole is welkom om hierdie riglyne te gebruik vir hul eie ingefaseerde terugkeer.

Dit is ook belangrik dat alle skole die voorlopige lys met personeel, wat **komorbiditeite** het, by u distrikskantoor indien. Stel asseblief 'n voorlopige lys met SBS-lede, nie-schoonmaakpersoneel en die res van die personeel saam.

Ek het 'n paar navrae oor veral die siftingsproses ontvang, en wie vir wie met aankoms by die skool deur die siftingsproses sal neem. **Kyk gerus na D – WKOD-riglyn: Sifting van Personeel en Leerders.**

Elke werknemer moet daagliks die siftingsproses doen. Die prinsipaal moet deur 'n aangewese SBS-lid of adjunkhoof deur die siftingsproses geneem word. Die prinsipaal kan dan die amptenaar se siftingsproses doen.

Dit is belangrik dat die temperatuur van elke leerder, onderwyser en nie-onderrigpersoneellid geneem en opgeteken word. Termometerskandeerders is geskeduleer om gedurende hierdie week afgelewer te word.

Die volgende vyf vrae moet ook deur elke individu met aankoms by die skool beantwoord word.

Nr.	Vraag
1	Hoes jy?
2	Het jy koors?
3	Is jy kortasem?
4	Is jou keel seer?
5	Was jy die afgelope 14 dae direk in aanraking met 'n bekende koronavirus-(COVID-19-) positiewe geval?

Indien enige personeellid ja op enige van die bogenoemde vrae beantwoord, word dit aangeraai dat die personeellid as voorsorgmaatreël huis toe gestuur word. As hierdie griepagtige simptome voortduur, of as iemand in direkte aanraking kom met 'n bekende koronavirus-positiewe geval, moet hulle die nasionale blitslynnommer skakel by 0800 029 999 of die provinsiale blitslynnommer by 021 928 4102 vir advies oor wat volgende gedoen moet word. Die sifting van personeel en leerders is 'n veilige proses as die toepaslike sosiale afstand en ander voorskrifte noudeset gevolg word.

Die WKOD is tans besig om spesifieke riglyne te finaliseer oor watter stappe 'n skool moet doen as 'n onderwyser of leerder siek lyk of simptome toon wat met Covid-19 verband hou, en die proses as daar 'n bevestigde geval van Covid-19 is.

Ek wil al ons prinsipale, SBS-lede, skoonmakers en nie-onderrigpersoneel wat reeds met die skoonmaak en beplanning vir hierdie totale anderse situasie begin het, opreg bedank. Ek vertrou dat die aangehegte inligting sal help om u op die hervatting van die skool onder moeilike omstandighede voor te berei. Ek het geen twyfel dat u leierskap, visie en deursettingsvermoë vorentoe, veral in die komende week, getoets sal word nie.

Die uwe



**BK SCHREUDER**  
**HOOF: ONDERWYS**  
**DATUM: 2020-05-15**